

TUSI TAIALA

MO LE PULEA MA LE VA'AIA LELEI O I'A MA
FIGOTA

O LE AFIO'AGA O

VAISALA

Aso 03 Iulai, 2000

SAUNIA:

Pule mamalu a Alii ma Faipule ma tagatanuu o le Afioga o Vaisala, ma le Lagolagosua a le Vaega o Faigafaiva o le Matagaluega o Faatoaga ma Faigafaiva.

1. FAATOMUAGA

O faigafaiva i Samoa e taua tele aua o se tasi lea o auala e maua ai le fofoga taumafa aemaise lava i alalafaga ma afio'aga i tua. I le tele o afio'aga, latou te le'o faatauaina le va'aia lelei o le tamaoaga ma le siosiomaga o le gataifale. O le aumaia le faaaogaina o ituaiga faigafaiva faa-onapo nei, e iai mea meanava, upega ma tili mataninii, ma vaialau oona e faamata faigofie ai ma tele i'a maua, ae o loo faatama'ia ai le siosiomaga o le gataifale ma ona tamaoaga. O le faatinoina foi o atinae i le gataifale, ua faaleagaina ai le tele o nofoaga ma le miliona o meaola o loo nonofo ma tautuufua ai. Ina ia faasaoina mai lea tulaga, ua faatuina ai e le Vaega o Faigafaiva o le Matagaluega o Faatoaga ma Faigafaiva se Polokalame mo le Pulega o le Si'osi'omaga o le Gataifale, ma le Va'aia Lelei o I'a ma Figota, ina ia fesoasoani i le fausiaina o se Pulega faa-faigafaiva i alalafaga ma afio'aga e faasao, pulea ma fuafua tatau le faaaogaina o le tamaoaga o le gataifale o Samoa.

2. FAAMATALAGA E UIGA I LE AFIO'AGA

2.1 Faamatalaga o Foliga Va'aia Faanatura o le Afio'aga

Faamatalaga	Aofa'iga
O le faitau aofai o tagata o lenei alalafaga	670
O le aofai o aoga i totonu o lenei afio'aga : Tulagalua	1
Aoga Faata'ita'i	1
O le aofai o falesa i totonu o le afio'aga : EFKS	1
O le umi o le a'au o le afio'aga	2 maila
O le mamao o le a'au mai le matafaga	¼ maila
O le loloto (futu) o vaega e aupito sili ona loloto o le aloalo pe a pe le tai i le taimi nei	6 futu
O le loloto (futu) o vaega e aupito sili ona loloto o le aloalo pe a pe le tai i taimi ao lei afaina i afa	12 futu

FAIGAFAlVA

Faamatalaga	Aofa'iga
O le faitau aofai o tamaloloa faifaiva e fagogota i le sili atu ma le tasi le aso i le vaiaso	20
O le faitau aofai o fafine faifaiva e fagogota i le sili ma le tasi le aso i le vaiaso	15
O le aofaiga o tagata e fagogota i tua'au mai le tasi le aso i le vaiaso	10
O le aofa'iga o paopao e faaaogaina mo faigafaiva i totonu o le afio'aga nei	Leai
O le aofa'iga o alia fagota o loo faaaoga mo faigafaiva a le afio'aga nei	1
E faatagaina ni tagata fagogota mai nisi alalafaga e fagogota i lo outou gataifale?	Leai

Ituaiga I'a/ Figota I'a maua soo se 5	Ituaiga Faigafaiva	Taimi faaalu mo le tasi tau'i'a/ 10 i'a/ ofu (Hrs)	
		Taimi Nei	10 Tausaga ua te'a
1. Pone	Lama	7 itula	½ itula
2. Alogo	Upega	7 itula	½ itula
3. Fuga	Uaua	7 itula	½ itula
4. Malau	Upega	7 itula	½ itula
5. Gatala	Upega	7 itula	½ itula
Figota maua soo se 3			
1. Pipi	Eli	1 itula	30 minute
2. Aliao	Lama	1 itula	30 minute
3. Alili	Lama moli	1 itula	30 minute

VAEGA TAUA O LE SIOSIOMAGA MO FAIGAFAlVA

Vaega	Vaega taua (sikuea mita)	
	Taimi Nei	Sefulu tausaga ua te'a
Togatogo	Leai ni to gatogo	¾ sikuea eka

Amu	3 – 5 sikuea eka	10 sikuea eka
Vaovao o le Sami	3 – 5 sikuea eka	10 sikuea eka

3. TULAFONO FAALE-NUU I ASO UA MAVAE & ASO NEI

O le tele o tulafono i aso ua mavae o loo faaaauu ona faaaogaina pea i aso nei i Vaisala. O nei tulafono e iai fanai'a, ava niukini, vailaau oona, ma isi o faigafaiva e le talafeagai.

O nei tulafono sa fofogaina lava i totonu o lenei afio'aga ma o loo faamamaluina ma amana'iaina e pei ona sa iai i le taimi muamua faatoa faamamaluina ai i totonu o le afio'aga o Vaisala. Ae peitai e le o mamalu i nei vaitaimi ona o le le amana'iaina e isi afio'aga tuaoi o tulafono a Vaisala.

O mafua'aga e pei ona ta'ua e aofia ai:

- Lei o se faamalosiaga e le Malo.
- O nisi o tagata o loo manatu mo le taimi nei ae le o tagai i le taimi o i luma faapea foi ma le lumanai manuia o tupulaga.

O nei mafua'aga uma o loo aafia i le Fuafuaga mo le Pulega o le Siosiomaga o le Gataifale ma le Va'aia Lelei o i'a ma figota.

4. O LENEI FUAFUAGA TATAU

E le gafatia na o le malosi faaetulafono a le Malo ona malu puipuia ai le siosiomaga o le gataifale ma ona tamaoiga. E utiuti tulaga tau tupe ma toagaogao foi le afaigaluega a le Malo latou te faamalosiaga ma una'ia tulafono tau faigafaiva i nuu taitasi o Samoa. O le fofu talafeagai o loo i aao o tagata o loo soifua ma alaala i le afio'aga faatasi ai ma le faamalumaluga a Fono a Alii ma Faipule. O nei fuafuaga na faataatia e le Komiti Faufautua o le Va'aia Lelei o i'a ma figota (KFVL) o le afio'aga le autu : **"Ina ia puipuia le siosiomaga o le Gataifale ma le toe faatupula'ia o i'a ma Figota mo Tupulaga o le Lumanai."**

4.1 Autu

O lenei fuafuaga ua taua ai ni faatinoga e manaomia ina ia maua ai sona taunuuga maumaututu. O le faamoemoe maualuga o le Malo ina ia faaleleia le soifua manuia o tagata o le afio'aga, ma ia faatupula'ia atili mea fofoga taumafa mai le sami. O lea e manaomia ai tagata uma ina ia avea nei faatinoga e puipuia ai le siosiomaga o le gataifale ma ia fuafua tatau ai le fagotaina o i'a ma figota. O nei fuafuaga na faataatia e le Komiti Faufautua o le Va'aia Lelei o i'a ma figota (KFVL) o le afio'aga le autu : **"Ina ia puipuia le siosiomaga o le Gataifale ma le toe faatupula'ia o i'a ma Figota mo Tupulaga o le Lumanai."**

Ua ioeina e le fonotaga a le Komiti (KFVL) i le Aso 22 o Iuni 2000, o le Fono a Alii ma Faipule latou te faamalosiaga ma una'ia vaega eseese uma o le afio'aga aua le puipuia ma le faasaoina o ainae ma alamanuia o le gataifale o Vaisala. O le komiti o loo gafa ma le tapenaga o tulafono aemaise o vaega uma e tatau mo le fuafuaga tatau.

O lenei fuafuaga ua faamoemoe ina ia oo atu i le tolu tausaga poo le sili atu foi, o loo faaaogaina pea, ae peitai, afai ae iai se suiga ua ao loa ona toe suesueina lenei fuafuaga.

4.2 Tapenaga

O lenei tapenaga sa saunia lava e tagata o le afio'aga o Vaisala, faatasi ai ma ni fautuaga auiliili ma le lagolagosua a le Ofisa o Faigafaiva o le Matagaluga o Faatoaga ma Faigafaiva. O se oototoga lenei o le tapenaga o le Pulega o le Siosiomaga o le Gataifale ma le Va'aia Lelei o i'a ma figota.

Feiloaiga Muamua : O lenei feiloaiga muamua sa faatalosagaina mai e le afio'aga e ala mai lea i le susuga i e tofi pulenuu, le tofa **Malolo Gie**, e fia auai le afio'aga o Vaisala i le polokalame e pei ona taua i luga a le Vaega o Faigafaiva.

Fono Muamua : O le tauaofiaga o le fono tele a le afio'aga i le aso 16 o Iuni 2000, na faamalamalamaina ai vaega uma, ma talia aloa'ia ai le Polokalame.

Vaevaeina o Vaega : O vaega sa vaevaeina iai le afio'aga, e aofia ai Matai, Aumaga ma le Komiti a Tina ma Tamaitai. Sa feiloai nei vaega eseese ma sui o le Ofisa o Faigafaiva, ma faatalatalanoa ai faafitauli o loo alia'e i le gataifale o le afio'aga, atoa ai ma ni tali talafeagai e ono fo'ia ai nei faafitauli.

Komiti Faufautua mo le Va'aia Lelei o i'a ma figota (KFVL) : O lenei Komiti, o loo aofia ai sui e toatolu o Faletua ma Tausi ma le Komiti sa finagalo iai le afio'aga, e aofia ai foi Aumaga e toafa, ma le luasefulu mai le Pulega mamalu a Alii ma Faipule. O le komiti la lenei sa latou tuufaatasia faamaumauga ma faamatalaga mai i nei vaega taitasi ma sa mafai ai ona latou tapenaina se ata faataitai o le Pulega o le Siosiomaga o le Gataifale ma le Va'aia Lelei o i'a ma figota. O lenei fuafuaga, o loo aafia ai lagona o tagata o le afio'aga i le puleaina o faigafaiva ma le siosiomaga o le gataifale.

Tauaofiaga o le Fono Tele : O le a tauaofia lenei Fono i le **Aso 20 o Iulai 2000** mo le taliaina, fautuaina atoa ai ma se teuteuga o le fuafuaga muamua o le Pulega o le Siosiomaga o le Gataifale ma le Va'aia Lelei o i'a ma figota.

5. FUAFUAGA FAATAATITIA

O fuafuaga faataatitia o ni gaioiga ua faamoemoe e faaono foia ai faafitauli ua faaalua ma faailoa mai e vaega eseese o le afio'aga. E lua ituaiga o fuafuaga faataatitia, ma o le fuafuaga ua aupito sili ona taua, o fuafuaga faataatitia lea ua faaagaaga mo nuu poo afio'aga. O le isi o fuafuaga faataatitia, ua faamoemoe lea mo le Ofisa o Faigafaiva, ma o lenei fuafuaga, o le a tuuina atu ai fautuaga ma fesoasoani aua le tapueina o le faamoemoe e pei ona fuafuaina. O gaioiga uma lava ua faamoemoe e faatino ai fuafuaga faataatitia mo le Ofisa o Faigafaiva, e ao ona faamaonia e le Faatonu Lagolago o Faigafaiva.

O nei fuafuaga faataatitia uma ua faamoemoe lo latou faataunuuna i le lagolagosua mai a le afioaga ma ona tagatanuu. O fuafuaga faataatitia uma o le a leai se aafiaga tuusao a le Ofisa o Faigafaiva. Ua iai le faamoemoe, o le a faaauau pea ona tuuina atu ni fesoasoani i le afioaga e ala atu i pepa o faamatalaga atoa ai ma le faia o ni tautalaga i vaega eseese e pei o aoga ma faalapotopotoga faale-Ekalesia.

Na faavae ma pasiaina e le fono i le aso **22 o Iuni 2000** ni tulafono e aiaia ai nisi o mataupu e pei ona taua i lalo:

- O faigafaiva le talafeagai
- Faaititia faigafaiva i le aloalo
- Faatafunaina o le gataifale
- Tulafono e puipuia ai le suauu e masaa i le gataifale
- Nisi o vaega faasaoina e pei o ogasami faasaoina, faafaatoagaina o i'a ma figota i le vai ma le sami
- Atinae talosagaina e le afioaga

O se aotelega o nei fuafuaga faataatitia na faapogai mai lea i faatalatalanoaga o faafitauli ma tali talafeagai i fonotaga a vaega eseese o le afioaga. O nei fuafuaga faataatitia ua aofia ai faatinoga ma tulafono e pei ona fautuaina e vaega eseese mo le fono mamalu a Alii ma Faipule.

5.1 Ina ia faamalosi Tulafono faale-nuu e faasaina ai faigafaiva e talafeagai i Vaisala

OTOOTOGA

O nisi o vaega tau faigafaiva e le talafeagai ua mautinoa lo latou tulaga ogaoga i le faatamaiaina o le fogatai (amu) ma le tele o meaola o le gataifale, ma o se faataitiga o nei ituaiga o faigafaiva le

talafeagai e pei o le vailaau ta-lavalava, ava niukini, tuiga poo saeuga ma le fanai'a. Ua le gata ina faatamaia ai se vaega tele o le fogatai (amu) ae faapena foi ona faaumiumi se taimi e mafai ai ona toe faatupuina le tele o meaola o le gataifale ua aafia ma mamate i nei ituaiga o faigafaiva. a faaleagaina le fogatai, o lona uiga o le a leai ni i'a ma ni figota e toe maia ai.

FUAFUAGA FAATAATITIA A LE AFIOAGA

Ua molimauina e le afioaga le malu puipuia o le pulega faalenuu i aso nei. I le fonotaga i le aso **29 o Iuni 2000** a le Komiti (KFVL) na molimauina ai le toe faamalositia ma unaia ai le Komiti ina ia toe faasalalauina ma faamautuina atili le tulafono ina ia malu puipuia ai le tulaga o le atinae aemaise o ogasami faasaina.

FAUTUAGA

Ina ia faatumauina pea ma faamalositia tulafono o loo iai a le afioaga mo le faasaina o faigafaiva le talafeagai.

TULAFONO

Ua matua faasaina lava faigafaiva le talafeagai e pei o fanai'a, ava niu kini tu'iga/ saeufa, vailaau oona ma isi i le gataifale o le afioaga o Vaisala.

TAIMI FAUTUAINA

Ina ia aloaia le faamamaluina ma le faamalositia o lenei tulafono pe a mavae le Fono Tele e pasia ai lenei taiala ia Iulai 2000.

FAASALAGA FAUTUAINA

O faasalaga o loo iai nei mo soo se tagata o Vaisala e maua ua ia solia le tulafono o le a iai pes lea i aao o Alii ma Faipule e tusa ma le \$100.00 lona solitulafono. O le le taliaina o lenei faasalaga, faatasi ai ma le solia e nisi mai isi afioaga o lenei tulafono, o le a molia loa i le Malo.

FUAFUAGA FAATAATITIA A LE OFISA

O le a fesoasoani le Ofisa o Faigafaiva mo le faatinoina o fuafuaga faataatitia a le afioaga e ala atu i lana polokalame fesoasoani faatasi ma le lagolagosua i faamatalaga ma fautuaga mo le faamautuina o ia fuafuaga.

5.2 Ia faasalalauina Tulafono a le Afio'aga

OTOOTOGA

Ua fautuaina e le KFVL le faasalalauina o tulafono a le nuu ua faamoemoe ma fa'aagaaga i le puipuiga o le siosiomaga o le gataifale ma ona tamoaiga ma faigafaiva.

FAUTUAGA

O faasalalauina i le itio o le a gafa lea ma Alii ma Faipule. O le Komiti (KFVL) o le a gafa lea ma le faamaoopoopoina aemaise le tapenaga o faasalalauina e faatatau i tulafono e puipuia ai le siosiomaga o le gataifale ma le vai atoa foi ma le lelei o i'a ma figota.

Autu o le Faasalalauina : Puipuiga o le Gataifale o Vaisala

TAIMI FAUTUAINA

O faasalalauina uma e ao ona faamaoopoopoina pe a maea ona faamaonia uma tulafono ua faatatauina ma faaagaaga i Pulega o le Siosiomaga o le Gataifale ma le Va'aia Lelei o i'a ma figota.

5.3 Faasaina o Suauu ma Penisini mai le masaa i le sami

OTOOTOGA

O se aafiaga tele ua tulai mai i le gataifale o Vaisala ona o suauu masaa ma penisini ua masaa pe saatia i le sami.

FUAFUAGA FAATAATITIA A LE AFIO'AGA

Ua faamalositia nei faaletulafono le faasaina o se suauu ona toe masaa ese mai i se vaa atoa ai ma suauu le aoga ona toe saatia i le sami. O le a puipuia foi ma va'aia e le afio'aga soo se vaa e masaa ese mai ai se suauu ma taofia loa.

TULAFONO

Ua matua faasaina lava se suauu ona toe sasaina pe masaa ese mai foi i se va'a i gataifale o Vaisala. O le le usitaia o lenei faaaliga o le a molia loa i le tulafono.

FUAFUAGA FAATAATITIA A LE OFISA

O le a fesoasoani le Ofisa o Faigafaiva mo le faatinoina o fuafuaga faataatitia a le afiaga e ala atu i lana polokalame fesoasoani faatasi ma le lagolagosua i faamatalaga ma fautuaga mo le faamautuina o fuafuaga.

5.4 Tulafono e Taofia ai le Faatafunaina o le Gataifale – Lafoaiina o Otaota i le sami ma matafaga.

OTOOTOGA

O le lafoai o otaota i le sami ma le matafaga e faapogai ai le avea ma nofoaga e faatupuina ai namu, faamanualia ai pe lavevea ai vae mai atigi apa ma atigi fagu ae faapena foi ona avea ma nofoaga o punaaga o faamai, avea o se nofoaga le talafeagai mo meaola o le sami ma le gataifale.

O le foia o nei faafitauli o le atofaina lea o se nofoaga e lafoina uma iai le otaota a le afioaga atoa. E mafai ona lafoaina otaota i se lua ma ufiufi malu lelei aua le saogalemu mai i faama'i ma siama feavea'i. Talu ai e mafai ona tafe ma ulu atu le oona o lapisi poo vaila'au e lafoaina i le lua o lapisi, o lea e fautuaina ai le eliina o lenei lua o lapisi i se nofoaga mamao ese mai puna vai taumafa ma le sami.

FUAFUAGA FAATAATITIA A LE AFIO'AGA

O nisi o fuafuaga faataatitia a le afio'aga o le saunia ma eliina o lua e faaagaaga mo le tuuina iai o lapisi ma otaota e pei ona taua.

TULAFONO

Ua matua faasaina lava ona toe lafoaia lapisi ma otaota e pei o atigi apa, fagu, uamea, pepa iila ma isi i le sami.

FAASALAGA

O le solia o lenei tulafono o lona faasalaga o le a i aao pea o Alii ma Faipule. O le le usita'ia o lenei faasalaga o le a molia loa i le tulafono.

FUAFUAGA FAATAATITIA A LE OFISA

O le a fesoasoani le Ofisa o Faigafaiva mo le faatinoina o fuafuaga faataatitia a le afio'aga e ala atu i lana polokalame fesoasoani faatasi ma le lagolagosua i faamatalaga ma fautuaga mo le faamautuina o fuafuaga.

5.5 Ia Iloiloina le tulaga talafeagai o le Faasaoina o se Vaega o le Gataifale o le Afio'aga.

OTOOTOGA

O se vaega o le gataifale ua faasaoina e tatau ona le toe aafia lea vaega i ni faigafaiva. o le avea o se vaega o le gataifale ma vaega faasao e ao aafia ai le malu puipua o le siosiomaga ma ona tamaoaiga (i figota ma i'a). O lenei vaega faasao o le a faasaoina ai togatogo, amu, faapea foi ma i'a ina ia mafai ona maua e nei meaola le avanoa e tautuufua ma fanafanau ai. O le autu taua lava, o le a avea lenei faasao ma puna'aga o i'a ma figota e mafai ai ona faaleleia nisi vaega o le gataifale ua afaina. O le a fanafanau ma tatuufua i'a ma figota o loo aumau i le vaega faasaoina, ma tafea atu o latou fua fanau, ma faatupuina ai meaola i nofoaga ua le maua ai ni i'a ma figota. O le a le pine ona manuia ai i tatou ae faapea foi tupulaga o le lumana'i.

FUAFUAGA FAATAATITIA A LE AFIO'AGA

O le afio'aga e ao ona :

- Galulue faatasi ma lagolagosua i le aufaigaluega a le Ofisa Faigafaiva i le faatinoina o le iloiloga o le tulaga talafeagai o se vaega o le gataifale o Vaisala e avea ma vaega faasaoina.
- Talanoaina ma auiliiliina le lipoti ma ia faia se faaiuga i le faavaeina o le vaega faasaoina.

Afai ae finagalo le Fono i se nofoaga e tasi iai:

Ia faatinoina loa fuafuaga mo le faavaeina, makaina loa le vaega o le faasao ma mataituina, tausiga ma le pulea lelei o se vaega ua atofaina.

FUAFUAGA FAATAATITIA A LE OFISA

O le Ofisa o Faigafaiva o le a :

- Faatinoina le iloiloga o le tulaga o se vaega o le gataifale e ave ama vaega faasaoina a'o el'i maea le masina o Aukuso, 2000
- Saunia le lipoti mo le tuuina aloa'ia atu i le Komiti o le Pulega o faigafaiva ma le Fono.

5.6 Ia Iloiloina le tulaga talafeagai ma le lelei o le Gataifale mo le tufaina atu ma le faafaatoagaina o I'a ma Figota.

OTOOTOGA

O le tufaina atu ua faatatau lea i le aumaia o ni figota poo ni i'a mai se isi atunuu ma tufa atu e faaola i se ogasami ua talafeagai. O le faafaatoagaina ua faatatau lea i le faaolaina-i-vai o i'a ma figota i se nofoaga ua saunia. O le tufaina atu ma faafaatoagaina o nisi ia o auala faa-atinae mo le faatupuina o i'a ma figota aua le fofoga taumafa o se afio'aga. O nei faiga faa-atinae e moomia ai lava le galulue filiga ma le faamaoni o le afioaga ina ia ausia se taunuuga lelei.

I le tele o vaega o le aloalo ma a'au o Samoa o loo maua ai figota e pei o le pae, asi ma le tugane. O nei figota ua mautinoa lo latou faaitiitia talu ai o le fagota ina e tagata mo le fofoga taumafa, ae ua faapena foi ona faatama'iaina o latou nofoaga e afa malolosi. I le tele o nofoaga ua le toe maua ai ni figota, pau le faamoemoe, o le aumaia lea o ni figota mai nisi atunuu ma tufaina atu iai aua le faaolaina i nei vaega o le gataifale.

Na faatalosagaina foi e le KFVL le faia o se aoaoga ma le tuuina atu o ni faamatalaga mo le faaolaina-i-vai o i'a i totonu o Vaisala. O le a iloiloaina foi e le Ofisa o Faigafaiva le tulaga talafeagai o le faatinoina o lenei ituaiga o atinae i le afio'aga.

FUAFUAGA FAATAATITIA A LE AFIO'AGA

E ao i le afio'aga ona:

- ❖ Galulue faatasi ma le aufaigaluega a le Ofisa o Faigafaiva i le faatinoina o le iloiloiga pe talafeagai ma lelei le gataifale o Vaisala i l tufaina atu ma le faafaatoagaina o i'a ma figota.
- ❖ Auiliiliina o le lipoti i suesuega o le gataifale, ma ia faia se faaiuga i le faatinoina o nei atinae i totonu o Vaisala.
- ❖ Galulue faatasi mo le leoleoina o nei atinae ma le va'aia o tagata o loo latou faatamaia ma solia tulafono e faatatau i nei atinae.

FUAFUAGA FAATAATITIA A LE OFISA

Afai ae finagalo le Fono i se tasi poo fuafuaga uma ua ta'ua:

- ❖ Pe a tusa ai, o le a tuuina atu ni fautuaga ma ni faamatalaga mo le tausiga ma le fafagaina o i'a ma figota ua faaolaina-i-vai.
- ❖ Pe a tusa ai, o le a tuuina atu i'a poo figota mo le tufaina atu i ogasami ua fuafuaina atoa ai ma le faafaatoagaina i vai ua saunia.
- ❖ Fesoasoani i le va'aia ma le mataituina o le sologa o le tuputupu ae o meaola ua atinaeina.

5.7 Ia una'ia Faigafaiva i tua'au ma Aoaoga mo faigafaiva.

OTOOTOGA

E mafai ma faaono faaleleia le tamaoaiga o i'a ma figota maua i luga o le aau ma vaega o le gataifale ua faaleagaina pe afai ae faaitiitia le fagotaina o nei vaega o le gataifale poo le una'ia o tulaga tau faigafaiva i tua'au ma aau mamao. O se tasi o auala e faaono faaleleia ai le tamaoaiga o le gataifale, o le fagotaina lea o ogasami e lei fagotaina lava aemaise o tua'au.

Ua iai le talitonuga i le KFVL, e ao ona una'ia ma faamallosia faigafaiva i tua'au ma a'au mamao ina ia tuumamaina ai le fagotaina o i'a ma figota o le a'au ma le aloalo. Ua le gata foi i lea, ae o le a mafai ai ona toe faatupulaia ma faaleleia ai le tamaoaiga o le tele o vaega o le gataifale ua faaleagaina. Talu ai ona o le tele o nuu e leai ni vaa e talafeagai mo fagotaga i tua'au, o lea ua taumafai ai le Ofisa o Faigafaiva e sailia ni vaa talafeagai mo lea faamoemoe.

FUAFUAGA FAATAATITIA A LE AFIO'AGA

Ua faatalosagaina e le afio'aga le Ofisa o Faigafaiva mo ni o latou vaa fagota se 2 ma ia faatinoina se aoaoga i auala tau faigafaiva e aoaoina ai le autautai o le nuu ma ia faatautaia e se alii Ofisa o Faigafaiva ua iai se tomai faapitoa tau faigafaiva.

Faamatalaga faaopoopo – Vaa mo fagotaga i tua'au : O le leai o ni vaa talafeagai mo fagotaga i tua'au, o le ala lea ua avea ma vaegase o le una'ia o faigafaiva i tua'au. E leai se vaa fagota e i le va o le alia ma le paopao, ma o se vaa i lea va ua talitonuina o le a talafeagai mo faigafaiva i tua'au. I sailiiliga a le Ofisa o Faigafaiva i se vaa talafeagai, ua filifilia ai le vaa e i le va o le 14 – 16 futu, ma o lona tau e itiiti ifo o le \$10,000 tala, tuufaatasi iai ma lona afi. O lenei ituaiga vaa, e mafai ona faa'auvaaina e ni tagata se 2 pe 3 foi, ma e mafai ona faaogaina lenei vaa i faigafaiva i tua'au. O le a fesoasoani le Ofisa o Faigafaiva i aiga taitasi i mea tau nonoga tupe aua le faatauina o le vaa ma le afi. O le a faia foi ni aoaoga mo le saogalemu i luga o le sami, teuina ma le va'aia lelei o i'a, tausiga o vaa atoa ai ma le faigao mea fagota.

FUAFUAGA FAATAATITIA A LE OFISA

O le a iloiloaina e le Ofisa o Faigafaiva manaoga i auala tau faigafaiva e ao ona fesoasoani e aoaina ai le mamalu o le autautai o le afio'aga. O le itu taua o le a aafia i nei aoaoga e pei o le teuina ma le va'aia lelei o i'a, saogalemu i luga o le sami, tausiga o afi o vaa, faasuina o i'a ma isi lava mataupu taua.

5.8 Faamatalaga e uiga i Upega

OTOOTOGA

O le talanoaina o upega i le fonotaga i le Aso 29 o Iuni 2000, ma ua ioeina ai e le Komiti le faaaogaina loa o le Tulafono Faatonutonu mo Faigafaiva 1996, e pei ona pasia e le Malo o Samoa ia Aperila i le tausaga 1996, mo le vaega e pei ona ta'ua i luga. O lenei tulafono o loo aafia ai mataupega fagota ma pa i'a e faatagaina.

TULAFONO

Silasila i le Pepa Faamatalaga 6

6. FAUTUAGA

Sa fautuaina e le komiti le Ofisa o Faigafaiva ina ia taofia le faatauina mai e le Faleoloa o Faatoaga upega mata nini'i, ae peitai sa faaalua e le Ofisa o Faigafaiva e faapea, o le tulaga o le taofia o le faatauina mai o nei ituaiga o upega i totonu o le atunuu, o le a le mafai ona taofia ona o nisi o mafuaaga e pei ona ta'ua i lalo.

“O nei upega o loo faaaogaina e puipuia ai togala'au aina atoa ma nisi atinae mai iniseti o loo latou faatamaiaina”

O lenei tulaga, sa faaalua ai e le Ofisa o Faigafaiva o loo iai tulafono lagolago a le Malo ma ua maea foi ona pasiaina, e uiga i le faaaogaina o nei upega mo fagotaga ma ua faamalositia nei e le Malo lona faasalaga mo soo se tasi e solia nei tulafono.

O lea ua finagalo ai le komiti ina ia avea tulafono a le Malo o loo iai nei e fai ma tulafono a le afio'aga e uiga e upega ma tili mata nini'i.

FUAFUAGA FAATAATITIA A LE OFISA

O le a fesoasoani le Ofisa o Faigafaiva mo le faatinoina o fuafuaga faataatitia a le Afio'aga e ala atu i lana polokalame fesoasoani ma le lagolagosua i faamatalaga ma fautuaga mo le faamautuina o fuafuaga.

7. TALOSAGA A LE AFIO'AGA

O talosaga a le Afio'aga e aafia le lisi ua ta'ua i lalo:

1. 2 Vaa fagota
2. faisua mo le faafaileleina i totonu o le aloalo
3. soo se figota (pipi, tugane, ma isi)
4. tilapia Isaraelu i totonu o le vai
5. ia faia ni auala ma fautuaga mo le faaititia o le tilapia Aferika o loo i le vai i le taimi nei.